

Dii Waadschn

" Olda, heid hobb i gsündichd,
heid hobb i nämli gekündicht.
I hobb maim Schäff a Waadschn geem,
ab heid beginnd füä uns a neus Leem!"
" Foddä, wii schdellsd dä dös dänn foä,"
brülld daraufhin mai Familijenkoä.
" Oldä, bisd edsd du doddal duächgedreed?
Dös wassd ja, dass es so nedd waidägeed!"

Wiä homm kann Pfennich auf dä Bonk,
dai Dochdä is dii gans Dsaid kronk,
dai Buu brauchd a boä neua Laadschn,
un du Rindfii gibsd daim Schäff a Waadschn!

Mai Olda will es Nudlhols ausm Schubbä holn,
" Wä soll dänn edsd unsä Schuldn bedsooln?"
" Olda, edsäd gibsd amoll a Ruu!"
do schläächd sii a scho dös äschda Moll dsuu!
Miä brummd mai Schädli wii a Biinaschwarm,
do siich i schowidä iian rechdn Arm.
Miä sausd es Nudlhols äneud aufs Hirn,
i ko grood noch ihre ledsdn Worte regisdriän.

Wiä homm kann Pfennich auf dä Bonk,
dai Dochdä is dii gans Dsaid kronk,
dai Buu brauchd a boä neue Laadschn,
un du Rindfii gibsd daim Schäff a Waadschn!

Ann Dooch späädä wach i im Kronknhaus auf,
hobb an moädsdrümmä Fäbond am Schädli drauf.
I kann niggs essn, i kann niggs drinkn,
un wenn i laaf, donn muss i hinkn.
Dii Schwesdä is olla halbe Stund kumma,
un hodd mä den blutichen Fäbond obgenumma.
Un jedesmoll, do hodds mii gfroochd,
worumm homms denn immä folgendes gsochd?

Wiä homm kann Pfennich auf dä Bonk,
dai Dochdä is dii gans Dsaid kronk,
dai Buu brauchd a boä neua Laadschn,
un du Rindfii gibsd daim Schäff a Waadschn!